



Inatsisartuni ilaasortaq Peter Olsen

Inuit Ataqtigiit

### § 37 naapertorlugu apeqqummut 165-mut akissuteqaat

Brevdato: 25-07-2016

Sags nr.2016 - 11248

Dok. nr. 11903834

Apeqqutinnut qujanaq, taakkulu matuma kinguliani issuarneqarput, akissutaannik malitseqartinneqarlutik.

**1. Ilumoorpa soraarnerussutisiallit pissakinnerillu ukiumut 180.000.kr-nit sinnilaarlugit ukiumut isertitaqarsimagunik taava nammineq inigisaminnut - illuminnut aserfallatsaaliinissamut 150.000 kr.-it tungaanut tapiiffigitissinnaaneq atorunnaartartoq.**

Postboks 909

3900 Nuuk

Tlf.: (+299) 34 50 00

Fax: (+299) 32 52 86

E-mail: isan@nanoq.gl

www.naalakkersuisut.gl

#### AKISSUT:

Innuttaasut inatsisit uku naapertorlugit inissiani najukkaminni iluarsaassinissamut tapiissutinik taarsigassarsianillu qinnuteqarsinnaapput:

- 1) Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq
- 2) Illuliortiternernut aningaasalersuineq pillugu Inatsisartut peqqussutaat nr. 1, 7. maj 2007-imeersoq
- 3) Kontomut pingaarnermut 89.72.11 Nammineq inissianik tapiissutitalimmik sanaartorneq, oqaasertaliussaq nr. 3

**1 PILLUGU.** Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq.

§ 45: Tassani allassimavoq, illunik Kap. 4 naapertorlugu sananeqarsimasunik – ulluinnarni "boligstøttemit illulianik" taaneqartartunik – iluarsaassinissamut, alliliinissamut pitsannguinnissamulluunniit tapiiffigineqarnissamut periarfissaqartoq. Ukiuni kingullerni marlunni inoqtigiinni isertitat akileraarutaasussat 180.000 koruunit inorlugit amerlassuseqarpata, imaluunniit inoqtigiit siunissami qanittumi ukiumut isertitassaat 180.000 koruunit inorlugit amerlassuseqassasut naatsorsuutigineqarpat taarsigassarsititsisoqarsinnaavoq. Meeqqamut 18-it inorlugit ukiulimmut, angerlarsimaffimmi najugaqartutut inuit nalunaarsorsimaffianni nalunaarsorsimasumut isertitassanut killiliussaq 4.000 koruuninik ilaneqartassaaq (taamaattorli meeqqat amerlanerpaamik arfiniliussapput).

Taarsigassarsititsisoqassappat, Namminersorlutik Oqartussanut taarsigassarsiaqarnissaq, imaluunniit Namminersorlutik Oqartussat maanna piginnittuusunut taarsigassarsititsisimanissaat piumasarineqarpoq. § 45-mi allassimavoq, tapiissutit 100.000 koruuninik amerlassuseqarsinnaasut. Kontomut

pingaarnermut 87.72.23 Boligstøtte, iluarsaassinermut tapiissutit oqaasertaliussinikkut qinnuteqartumut ataatsimut tapiissutaasinnaasunut amerlassusiliussat 150.000 koruuninut allanngortinneqarput.

§ 62: Tassani allassimavoq, illunik sanaqataaffiusunik iluarsaassinissamut tapiinissamut periarfissaqartitsisoqartoq. Ukiuni kingullerni marlunni inoqutigiinni isertitat akileraarutaasussat 180.000 koruunit inorlugit amerlassuseqarpata, imaluunniit inoqutigiit siunissami qanittumi ukiumut isertitassaat 180.000 koruunit inorlugit amerlassuseqassasut naatsorsuutigineqarpat. taarsigassarsititsisoqarsinnaavoq. Meeqqamut 18-it inorlugit ukiulimmut, angerlarsimaffimmi najugaqartutut inuit nalunaarsorsimaffianni nalunaarsorsimasumut isertitassanut killiliussaq 4.000 koruuninik ilaneqartassaaq (taamaattorli meeqqat amerlanerpaamik arfiniliussapput).

Taarsigassarsititsisoqassappat, Namminersorlutik Oqartussanut taarsigassarsiaqarnissaq, imaluunniit Namminersorlutik Oqartussat maanna piginnittuusunut taarsigassarsititsisimanissaat piumasarineqarpoq. § 62-mi allassimavoq, tapiissutit 75.000 koruuninik amerlassuseqarsinnaasut. Kontomut pingaarnermut 87.72.23 Boligstøtte, iluarsaassinermut tapiissutit, oqaasertaliussinikkut qinnuteqartumut ataatsimut tapiissutaasinnaasunut amerlassusiliussat 150.000 koruuninut allanngortinneqarput.

**2 PILLUGU.** Illuliortiternernut aningaasalersuineq pillugu Inatsisartut peqqussutaat nr. 1, 7. maj 2007-imeersoq.

Boligstøttemut aaqjissuussineq imaluunniit illunut sanaqataaffiusunut aaqjissuussineq avaqqullugu illunik namminerisaminnik piginnittut, ukiut 20-t matuma siorna illuliaasunik, aammalu 95 kvadratmeterit inorlugit angissusilinnik inissiaatillit, iluarsaassinermut, pitsanngorsaarnermut alliliinermullu aningaasartuutissat 40%-iinik taarsigassarsiniarsinnaapput. Taarsigassarsiat annerpaamik 283.500 koruuninik amerlassuseqassapput, aammalu aatsaat piginnittut nikinnerini akiligassanngortinneqassapput, soorlu illumik piginnittup inissiaatiminik tunisinerani. Taarsigassarsianut taakkununnga isertitat apeqqutaatinneqanngillat.

**3 PILLUGU.** Kontomut pingaarnermut 89.72.11 Nammineq inissianik tapiissutitalimmik sanaartorneq, oqaasertaliussaq nr. 3

Oqaasertaliussaq taanna 9. marts 2016-imi Aningaasaqarnermut Akileraartarnermullu Ataatsimiititaliamit akuerineqarpoq. Oqaasertaliussami Namminersorlutik Oqartussat illunik piginnittunut soraarnerussutisialinnut aamma siusinaartumik soraarnerussutisialinnut, aammalu illunik boligstøttemit taarsigassarsilluni imaluunniit illutut sanaqataaffiusutut sanaajungitsunik piginnittunut, aammalu sumiiffimmi inissiamik iluarsaassinissamut realkredit-imit aningaaserivimmilluunniit taarsigassarsiviusinnaanngitsumi najugaqartunut taarsigassarsititsinissaat periarfissinneqarpoq. Taarsigassarsiat 150.000 koruunit tikillugit amerlassuseqarsinnaapput, aammalu aatsaat piginnittut nikinneranni akilersugassanngortinneqassallutik. Taarsigassarsianut taakkununnga isertitat apeqqutaatinneqanngillat.

**a. Taamaassimappat sumik tamanna pissuteqarpa aamma qanga sumilu aaliangiiffineqarpa?**

## AKISSUT:

Inatsiartut aalajangiiffigaat

- Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq
- Illuliortiternernut aningaasalersuineq pillugu Inatsisartut peqqussutaat nr. 1, 7. maj 2007-imeersoq

Kontomut pingaarnermut 89.72.11 Nammineq inissianik tapiissutitalimmik sanaartorneq, oqaasertaliussaq nr. 3 pillugu Naalakkersuisut qinnuteqaataat Aningaasaqarnermut Akileraartarnermullu Ataatsimiititaliamit akuerineqarpoq.

**b. Ukiumut 180.000.kr sinnilaarlugit isertitaqartartunut, soorlu 183.000.kr-nik ukiumut isertitaqartartut tapiiffigineqarsinnaanngorniarlugit naalakkersuisut qanoq pilersaaruteqarpat?**

Tapiissuteqarnissamut taarsigassarsititsinissamullu isertitanut killissarpianik aalajangersaanissaq ajornartorsiorfiusinnaasoq Naalakkersuisut isumaqatigaat. Taamaattumik matuma siuliani taaneqartutut aamma ilaatigut inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaanni nr. 11-mi, 19. november 2007-imeersumi ilaqtariit meerartallit eqqarsaatigineqarput, peqqussummi inoqtigiit amerlanerusunik isertitaqarsinnaanerat periarfissinneqarluni (meeqqamut ataatsimut 4.000 koruunit, taamaattorli annerpaamik meeqqat arfinillit.

Aamma taakku saniatigut inissialiortiternermut iluarsaassinermullu inatsisini pissutsit isumaginninnermut tunngasut tamaasa ilaatinneqarnissaat ajornakusoorpoq. Kisiannili innuttaasut kikkulluunniit isumaginnittoqarfimmuut saaffiginnissinnaapput, ikiorserneqarnissamut qanoq periarfissaqarnerlutik apeqqutigalugu.

Inussiarnersumik inuulluaqqusillunga

Knud Kristiansen